

Uorden da scola dil consorzi da scola dallas vischnauncas da Laax-Falera-Sagogn-Schluein

Sebasond sigl art. 20 dalla Lescha davart las scolas popularas dil cantun Grischun (lescha da scola) dils 21 da mars 2012.

Denominaziuns da persunas, da funcziuns e da professiuns en quels statuts serefeschan ad omisduas schlatteinas, schinavon ch'ei seresulta buc enzatgei auter ord il cuntegn dils singuls artechels.

I. Disposiziuns generalas

Art. 1

Scalems da scola

¹ Il consorzi da scola meina ils suandonts scalems da scola:

- a) il scalem da scoletta
- b) il scalem primar
- c) il scalem secundar 1

² Per affons da lungatg jester eis ei obligatori da frequentar la scoletta.

Art. 2

Liug da scola

Il consorzi da scola meina ils suandonts loghens da scola per ils differentes scalems da scola:

- scalem da scoletta: vegn menaus en mintga vischnaunca dil consorzi;
- scalem primar da Falera e Laax: la 1. e 2. classa vegnan menadas a Falera, la 3.-6avla classa a Laax;
- scalem primar a Sagogn e Schluein: la 1./2. classa vegn menada en omisduas vischnauncas dil consorzi sco classa cumbinada, la 3. e 4. a Sagogn e la 5avla e 6avla classa a Schluein vegnan per regla menadas sco partiziun d'ina classa;
- scalem secundar 1: vegn menaus a Laax.

Art. 3

Obligaziun d'ir a scola, frequentaziun gratuita

L'obligaziun d'ir a scola sco era la frequentaziun gratuita sedrezzan tenor il dretg cantunal.

Art. 4

Uras da bloc

Il consorzi da scola garantisce las uras da bloc prescettas dil Cantun.

Art. 5

Structuras dil di

Il consorzi da scola porscha en cass da basegns en tut ils loghens da scola structuras dil di supplementaras.

Art. 6

Purschidas
supplementaras

¹ Il consorzi da scola porscha lavur sociala da scola.

² Il consorzi da scola organischescha en cass da basegrs purschidas supplementaras sco classas da time-out ni purschidas specialas per scholaras e scholars cun talents extraordinaris.

Art. 7

Mesiras dalla
pedagogia
speciala el
sector sempel

Per ordinar e realisar las mesiras dalla pedagogia speciala el sector sempel ei il consorzi da scola responsabels.

Art. 8

Valetaziun,
promoziun,
midada da
scalem

La valetaziun sco era la promoziun e la midada dil scalem dallas scholaras e dils scholars succedan tenor il dretg cantunal.

II. Menaschi da scola

Art. 9

Lungatgs

¹ Per tut las classas ei il romontsch (sursilvan) il lungatg d'instrucziun.

Per informar e comunicar cun scholaras e scholars d'auters lungatgs duein ins prender risguard a moda commensurada.

² Sco lungatgs jasters vegnan purschi naven dalla 3. classa primara tudestg e naven dalla 5avla classa primara engles.

³ Il consorzi da scola s'engascha tenor il concept linguistic dil consorzi da scola per la promoziun dil lungatg da scola e d'instrucziun.

Art. 10

Transport da
scolaras e
solars

La cumissiun da scola relai in reglament da transport.

Art. 11

Secretariat da
scola

Al consorzi da scola stat a disposiziun in secretariat da scola che sustegn las direcziuns da scola sco era las persunas dil fatg e las persunas d'instrucziun en lavurs administrativas. Tut ils loghens da scola san far diever dils survetschs dil secretariat da scola.

III. Scholaras e solars

Art. 12

Obligaziuns

Las scholaras ed ils solars ein obligai da frequentar regularmein la scola sco era las occurrenzas da scola ed ils cuors declarai sco obligatoris.

Art. 13

Uorden
disciplinar ed
uorden dalla
casa da scola

Las scolaras ed ils scolars ston observar las prescripziuns digl uorden disciplinar e digl uorden dalla casa da scola.

IV. Persunas d'instrucziun ed autras collaboraturas e collaboraturs

Art. 14

Relaziun
d'engaschament

¹ Las persunas d'instrucziun ed autras collaboraturas e collaboraturs ein persunas engaschadas dil consorzi da scola.

² La relaziun d'engaschament dallas persunas d'instrucziun e d'autras collaboraturas e collaboraturs vegn reglaus cun in contract da dretg public che riguarda il dretg cantunal.

Mandat
professionai

Ultra dall'instrucziun e dalla collaboraziun s'auda tier il mandat professionai dalla persuna d'instrucziun il perfecziunament e la participaziun alla concepziun, alla cultura ed al svilup dalla scola. La direcziun da scola sa far prescripziuns en quei connex.

V. Direcziun da scola

Art. 15

Relaziun
d'engaschament

¹ Il consorzi da scola installescha ina direcziun da scola.

² La direcziun da scola seconstituescha d'ina direcziun generala da scola, mintgamai d'ina direcziun da scola locala per la scoletta e la scola primara da Laax-Falera e per la scoletta e la scola primara da Sagogn-Schluein e d'ina direcziun da scola per il scalem superiur 1.

³ Igl engaschament dallas direcziuns da scola vegn reglaus cun in contract da lavur da dretg public che riguarda il dretg cantunal.

Art. 16

Funcziun

La direcziun da scola ha l'incumbensa da procurar per il menaschi operativ ed il svilup qualitativ dalla scola. Ella ei plinavon responsabla per la direcziun dils secturs pedagogia, persunal, organisaziun, finanzas ed administraziun.

Art. 17

Incumbensas e
cumpetenzas

¹ Las incumbensas e las cumpetenzas dalla direcziun generala da scola sco era dallas direcziuns da scola localas e dalla direcziun da scola dil scalem superiur ein regladas els carnets da duers respectivs ed el diagram da funcziuns che vegnan relaschai ed approbai dalla cumissiun da scola.

² La direcziun da scola ha en special las suandontas incumbensas:

- realizar l'orientaziun strategica fixada dalla cumissiun da scola, las finamiras da legislatura e las finamiras annualas sco era il maletg directiv;
- prender mesiras en favur dil svilup dalla scola e dalla qualidad en concordanza cun la cumissiun da scola;

- far il rapport final a scret per mauns dalla cumissiun da scola per realisar las finamiras dil svilup dalla scola e dalla qualitat;
- far propostas alla cumissiun da scola arisguard l'elecziun ni la relaschada da persunas d'instrucziun;
- far propostas alla cumissiun da scola per fixar las cundiziuns d'engaschament per persunas d'instrucziun, inclus ils scalems da paga el rom dalla legislaziun cantunala;
- eleger e relaschar ulteriur persunal dil consorzi da scola
- cussegljar, sustener e giudicar tut il persunal da scola;
- orientar la cumissiun da scola davart igl onn da scola current, davart divergenzas dil preventiv e davart schabetgs impurtonts (rapport periodic);
- decider davart scolarisaziuns anticipadas resp. suspensiuns (scoletta, scalem primar);
- decider davart la cuntinuaziun digl onn da scola en ina classa pli bassa, sch'igl affon ei surdumandaus;
- decider davart sursigilir ina classa;
- decider davart purschidas supplementaras per affons da lungatg jester tenor il concept linguistic dil consorzi da scola e davart l'organisaziun da talas;
- decider davart l'ordinaziun e l'annullaziun da mesiras dalla pedagogia speciala sin il sector sempel e davart l'organisaziun da talas;
- decider davart la cuntinuaziun dalla formaziun, suenter ch'il temps da scola obligatori ei terminaues;
- decider davart ina relaschada anticipada d'in affon sin il pli baul suenter otg onns da scola obligatoris;
- decider davart l'exclusiun dalla scola durant la frequentaziun dalla scola postobligatoria;
- decider davart il congedi da scolaras e scholars tochen 15 dis;
- relaschar in uorden dalla casa da scola;
- fixar il temps d'instrucziun quotidian;
- elavurar per mauns dalla cumissiun da scola in concept arisguard la tgira dalla lavur da geniturs e la participaziun da geniturs e da scolaras e scholars (p.ex. cussegl da geniturs, parlament da scolaras e scholars).

VI. Cumissiun da scola

Art. 18

Organisaziun,
cumpetenza da
decider

La cumposiziun e l'organisaziun sco era il cuoz digl uffeci e la cumpetenza da decider dalla cumissiun da scola sedrezzan tenor ils statuts dil consorzi da scola.

Art. 19

Funcziun

¹ La cumissiun da scola ei, cun resalva dallas incumbensas e cumpetenzas dallas radunonzas communalas, igl organ suprem dil consorzi da scola. Ella ei responsabla per la survigilanza generala dil menaschi da scola. Ella meina e surveglia igl areal da scola cun risguardar las prescripziuns dalla Confederaziun, dil Cantun e dallas vischnauncas. Ad ella suttastat en special la direcziun strategica dil consorzi da scola.

² La cumissiun da scola fixescha l'orientaziun strategica e las finamiras, en special las finamiras strategicas e/u las finamiras annualas ed approbescha

il rapport respectiv dalla direcziun da scola. Las finamiras strategicas cuozan per regla quater onns.

Incumbensas e
cumpetenzas

¹ Las incumbensas e las cumpetenzas ein regladas el diagram da funcziuns che vegn relaschaus dalla cumissiun da scola.

² La cumissiun da scola ha en special las suandontas incumbensas:

- elavurar e modificar igl uorden da scola per mauns dallas radunonzas communalas;
- elavurar in maletg directiv dalla scola, verificar quel periodicamein e sviluppar vinavon el;
- engaschar e relaschar sco era menar/sustener la direcziun da scola;
- eleger e relaschar persunas d'instrucziun sin proposta dalla direcziun generala da scola;
- fixar las cundiziuns d'engaschament per persunas d'instrucziun, inclus ils scalems da paga el rom dalla legislaziun cantunala sin proposta dalla direcziun generala da scola;
- approbar e relaschar igl uorden disciplinar ed eventualmein ulteriuras prescripziuns e reglaments sin proposta dalla direcziun da scola;
- relaschar il diagram da funcziuns ed il carnet da duers per la direcziun da scola;
- elavurar ed adattar ils contracts da locaziun per mauns dallas suprastonzas communalas;
- cumpilar il rapport annual, il preventiv ed il quen annual per mauns dallas suprastonzas communalas che suttamettan quels allas radunonzas communalas per approvaziun;
- eleger il miedi ed il dentist da scola;
- fixar las vacanzas – cun excepziun dallas vacanzas d'atun e da Nadal – en cunvegna e tenor coordinaziun cun las autoritads da scola dalla regiun e declarar sco obligatorias occurrenzas da scola specialas che han liug suentermiezdis libers ni sondas;
- relaschar in reglament davart absenzas e congedis sin proposta dalla direcziun generala da scola;
- relaschar in reglament davart las structuradas dil di inclus il reglament da tariffa;
- decider davart l'exclusiun dalla scola d'in affon durant il temps da scola obligatori;
- decider davart l'admissiun d'in affon dad auters portaders da scola e davart la taxa da scola;
- approbar sin proposta dalla direcziun da scola il concept arisguard la tgira dalla lavur da geniturs e la participaziun da geniturs e da scolaras e scolars;
- ev. relaschar in reglament da persunal.

Art. 20

President

¹ Las incumbensas dil president dalla cumissiun da scola ein descrettas els statuts.

² Il president ei responsabel che la cumissiun da scola adempleschi las incumbensas adossadas ad ella tenor duer e cun risguardar las prescripziuns legalas, statutaras e reglamentaras e ch'els conclus e las decisiuns dalla cumissiun da scola vegnien realisai a moda adequata e punctuala.

³ Il president ei responsabel per la survigilanza dalla direcziun da scola e per la controlla da lur activitad. Per quei intent ha liug ina tochen duas gadas

il meins in brat standardisau denter il president e la direcziun generala da scola.

⁴ Il president tgira il brat cun ils presidents communalas el rom da silmeins duas sesidas annualas, en special en connex cun il quen annual ed il preventiv dil consorzi da scola

⁵ Il president ei responsabels per la scolaziun ed il perfecziunament dallas commembras e dils commembers dalla cumissiun da scola e dalla direcziun da scola.

⁶ Il president procura a moda adattada per in'evaluaziun dils resultats e dalla cultura da lavur dalla cumissiun da scola.

VII. Giurisdicziun

Art. 21

Recuors da
survigilanza

¹ Reclamaziuns che sedrezzan ad ina persuna d'instrucziun ein d'inoltrar alla direcziun da scola. Avon eis ei d'encurir il discuors cun la persuna d'instrucziun.

² Reclamaziuns che sedrezzan alla direcziun da scola ein da drizzar alla cumissiun da scola. Avon eis ei d'encurir il discuors cun la direcziun da scola.

Art. 22

Vias legalas

¹ Encunter disposiziuns e conclus dallas personas d'instrucziun sa vegnir fatg recuors enteifer diesch dis alla direcziun da scola.

² Encunter disposiziuns e conclus dalla direcziun da scola sa vegnir fatg recuors enteifer diesch dis dapi la communicaziun alla cumissiun da scola.

³ Encunter disposiziuns e conclus dalla cumissiun da scola sa vegnir fatg recuors enteifer diesch dis dapi la communicaziun al Departament d'educaziun, cultura e protecziun digl ambient dil Grischun, aschinavon che la lescha da scola cantunala prevesa buc enzatgei auter.

⁴ Encunter decisziuns d'assegnaziun negativas ed encunter disposiziuns arisguard nunpromozziun resp. promozziun sa vegnir fatg recuors enteifer 10 dis agl Uffeci per la scola populara ed il sport.

VIII. Disposiziuns finalas

Art. 23

Entrada en vigor

Quei uorden da scola entra en vigor cun la lubientscha dallas radunonzas communalas e dil Departament d'educaziun, cultura e protecziun digl ambient sin igl 1. d'uost 2022.

Approbau dallas radunonzas communalas

Laax, ils ... 23.04.2022

president communal

[Signature]



scarvon communal

[Signature]

Falera, ils *20.05.2022*

president communal

[Signature]



scarvon communal

[Signature]

Sagogn, ils *20.06.2022*

president communal

[Signature]



scarvon communal

[Signature]

Schluein, ils *12.04.2022*

president communal

[Signature]



scarvon communal

[Signature]

Approbau dil Departament d'educaziun, cultura e protecziun digl ambient ils ...